

四庫全書

史部

欽定四庫全書

史部
錢通卷二

詳校官編修臣溫汝适

編修臣程嘉謨覆勘

總校官中書臣朱

鈐

校對官中書臣王

瓚

膳錄監生臣陳

煜

欽定四庫全書

史部十三

錢通

政書類三 邦計之屬

提要

臣等謹案錢通三十二卷明胡我琨撰我琨字自玉四川人其書專紀明代錢法而因及于古制首曰正朔一統次曰原曰制曰象曰用曰才曰行曰操曰節曰分曰異曰弊曰文曰閏凡十三門每門之中各為小目其載明

制起洪永訖萬厯徵引各史紀志列傳以及古今說部各種文集其於明代錢幣沿革條分縷晰多明史食貨志及明會典明典彙諸書所未備者至敘述古制如引桂海虞衡志記右江之銅引宋會要記利州諸監錢數又足補唐宋各史及三通所未詳他如錢象門之黃河錢投河國錢諸品又董道洪遵李孝美顧烜各家舊譜所未載其採撫可謂詳博

中如劉仁恭丸土為錢之類乃一時謬製亦
倣圖其式未免稍雜然義取賅備不得不巨
細兼收正未可以叢脞譏也乾隆四十三年
五月恭校上

總纂官

臣紀昀

陸錫熊

臣孫士毅

總校官

臣

陸費墀

欽定四庫全書

提要

錢通原序

古之欲通天下之故而利民用者自太昊以金始迄禹
湯時水旱為厲民用多艱乃即山廣鑄濟金之窮以濟
民而用以溥利者抑又至矣泉義取水水之為物流行
坎止不失其常舉江湖河海以及溪澗溝洿無不分委
而匯其源滿其量及秦以錢名則從戈而利害之倪倚
伏矣誰能神而明之通變於未窮乎予才詘識疎謬叨
治役值園政極塞之秋枯心竭力勉圖整頓卒不易得

因簡羣書懸為一鑑反覆揣摩竊有慨焉彼治平大道
曰生財財之生也惟無以戕之則生無以秘之則生生
者通之也以天下之物情調適于輕重高卑緩急盈縮
咸得其平而準之上下相濟流於不滯損益相濟沛于
不涸是又以濟之者通之然通之法未易言也錢以濟
金而法不能使錢濟世詎曰無法上握而下撓之朝從
而暮拂之此利而彼蠹之況今爐索如雲工散權分銅
湧錢滯即能者在職而天人交誼奸弊橫生嫌怨相持跲

踟四顧仰屋興嗟試起古人而問焉亦莫能度若津者
究且金與錢與法俱窮蓋本末之絨未逗而子母之脉
皆槁矣將柰之何易曰乾始能以美利利天下不言所
利大矣哉茲言也其鑄世之良模也予閱阿堵之迹不
勝收但取預家國之資類萬物之情者隨意筆之此中
無限陰陽變幻之狀古今升沉之局聊一點綴以呼沉
夢此錢通所繇作也是役也予覩其旨而橐之西湖何
方二友刪繁補遺以卒其業曷以次之蓋事必有所始不

尋始何以識因革考制所以先討原也制考而代更之
利病靡不晰無象焉則制曷繇考凡輪廓肉好文號銖
兩測古者緣象索神或行或阻有機焉非祇求真偽于
形似也象立而用張一代之制必通一代之用豈真亡
用器乎然運用者才鮮才則用不神故受之以才濟才
者術微術則用不廣故受之以術而且以是明操以是
慎節顯然語天下咸有定分而不可踰也安分則常否
則異述異正期人居易俟之不然者有弊而無利故攻

弊獨詳若名章竒什丁寧告戒一言而利溥何可不悉
登之以資擬議故以文終焉書成適秋月在閏且十二
分與歲功等復取十二分中不及彙者閏如其時總之
不先時制則法不尊首以尊時斯後先不易之規得憲章
而觀其會通乎覽是編者將謂經術即在是歟抑別有
道焉如瓊山所云新天下之耳目通天下之貨物革天
下之宿弊利天下之人民者耶嗟嗟時異世殊萬慮難
齊百艱莫恤即西漢晁董公孫輩復出誰能濟經術之

窮而通天下之故者哉予日望之西蜀胡我琨

錢通原序

凡例

一是書之作寔繇百貨皆資一錢流則顯碩之脰翼積
則甌亂之叢淵金土價倖業不見於輓世布刀權縮
猶可望於通人三家邨掌貝囊蚨亦沾沾自足萬石
君緡山貫海必岌岌多虞唯行有用之財故制無用
之器旌心誠欲其賤標目聊取夫通名之揭焉利云
溥已

一作書之意蒐冶雖古崇鑄惟王總之錢以濟時國以

興法周立九圜而漢則刀錯唐行元寶而宋則楮交
即或藉之為規要必擅其所統先進後進疇違昭代
之氓生今用今不倍會朝之典首尊皇制目信憲章
庶幾衆志不惑而克從官籍可稽而曷弊

一 泉書所彙典故靡全紀事紀文粗備徒煩裂錦審端
審委詳擷寧厭濫觴蓋欲徵掌府之權衡何所恃腹
笥之江海曹收獨啖扶秘糾愆將稱大備于孔方豈
之餘緒于阿堵分門仿諸成歲合璧像其拓奇務發

千古金氣之精靈以成一代玉函之要義持茲十三卷可助百一思也

一泉譜括諸夷夏象繪式自洪遵雖非腐繭以抽絲固可因孤而緝毳慙入套襲多恐雷同種類分系不妨星綴故疏冶鑄之繇于制部寄天奇之品于異門之代之名仍留舊識曰志曰紀或見殊塗惟外品不移緣四夷無攷直可云稱王于夜郎不幾乎嘆洋于河伯一羣籍之括櫟甚繁而大意之垂鑑自定是以甄準聖

賢塗合錄期廉鄙風興匏史稗官固其不廢丘墳籌
範乃所必先扼要從文獻之徵提綱擇典會之載炯
戒攸寓異弊加詳嫩惡非有鑪錘寶貨總當揚扃且
歷代鼓鑄互有得失而本朝流行蚤有規模下及僭
倖株禍中多鄉嫖宛委冗芟同耨癥索垢吹不使豕
渡西河錯成縣鐵何至牛捐玄海陶務生銅

一錢幣之設紛布自浮筆舌之家纂組彌極即有端明
讀史之法而寡文裕柯事之精非蹈固陋以廣蟲冰

則墮荒唐而作孤野茲引書間為損益据跡不强分
聯長或篇收短或句拾必窮源而探委匪割鶴以企
鳧庶帙可方乎指南而觀不難夫撲滿矣

一分類頗稱權輿繫閏每多瑣礫然學古貴乎博患其
不精而惕世貴乎周患其不備實見聞之斷楮讐出
入之流泉豈郊天鼓必麟皮抑覲帝香須龍腦如其
當意奚復分肢醫巫之玉札芝莖珍為上藥而牛溲
馬淳亦佐不虞貨殖之鐵冶魚鹽居為奇貨而犀尖

象齒誠獲其時俾美利歸之類餘將疾疾瘳于貫朽
一權歸私治鄧通因以起家利自官衡劉濞卒而滅國
招鑄濫於唐德盜樣侈於宋仁任鉛錢之橫流致銀
錫之壅塞非今如爾自古已然識漫之篆既無磨郭
之令又鮮如或愛工弛器必致隱局爭銅懸式可復
見之何人倒換安能行之此日所以鑪難緝刷銖孰
提秤非詳制幣而警其繇是設陷窵而誘之入援實
以況平世飾辯以代刑書公不侵漁偽無耗蠹

一班固作漢書不及和帝李燾續宋表亦止靖康非近
事之難編固遺規之有待矧我列聖之鑄功治德足
以昭示無疆而茲三朝之芳塋懿型正在流傳莫考
徵所聞于神廟吾從大夫奏其議于今皇以俟君子
疇云通史亦曰錢經

一書若令種類之溷淆必致次第之顛倒要是淘金揀
玉直難得手應心今固位置頗嚴而或紕綴不少分
門序代已從事跡費搜求繆後漏先安向文詞工探

討且讀書只須識字然走馬亦可吹藜總冀錢神之
有靈罔顧筆花之無色

一樓輸二酉乃媿惠施之藏車戴一星更歎侯巴之問
論衡無繇竊得隣家何處借看況乎襪線其才甕天
其見目以鈍而刺不深心以乏而記不强遺蠹必多
汗牛宜補敢虛游办之地用待伐山之編則題糕者
有糗餌之稽藉稻者為瑯琊之誌

錢通凡例

欽定四庫全書

錢通卷一

明 胡我琨 撰

正朔一統

會朝以歷代之八成九式經錢贊邦用帥圜府之
屬而飭鼓鑄之法廼施式于都郡而立其監設其
員陳其制勝以木楔曰不用法者國有常刑凡浙
豫洛閩黔粵之克充治者寶泉有局宣課有司入

其職于受藏受用之府則頒俸糈于僚索軍旅去鉛錫贗偽民雖衰而不時而規模自宏遠矣

洪武初置寶源局於應天府鑄大中通寶錢與歷代錢兼行以四百為一貫四十為一兩四文為一錢設官專管江西等行省各置貨泉局頒大中通寶大小五等錢設官鑄造令戶部及各行省鑄洪武通寶錢其制凡五等當十錢重一兩當五錢重五錢當三錢當二錢皆如其當之數小錢重一錢

會典

洪武初令所在湖池民舟經涉其河泊之官敢有妄取水面錢者罪不赦

洪武二年令凡買賣田宅頭匹赴務投稅除正課外每契本一紙納工本銅錢四十文餘外不許多取

同上

洪武二年時倭寇劫掠蘇州崇明沿海皆患太倉衛守禦指揮僉事翁德帥官軍捕之遇於海門之上幫擊殺不可勝數生獲數百人得其兵器海舟奏之詔以德有功陞本衛指揮副使其官按賞綺帛白金有差戰溺死

者加賜錢布米

皇明從
信錄

洪武六年禁民間私鑄銅錢凡私鑄者許作廢銅送官
每斤給官錢一百九十文諸稅課內如有私錢亦為更

鑄

會
典

洪武七年十月皇太子臨大本堂召東宮贊讀及諸主
伴讀凡二十五人立庭下諭之曰爾等離父母去墳墓
者三年矣今冬氣向深草木搖落寧不惻然動懷土之
情乎吾已為爾請於上宜各旋歸歸即適至母久淹為

也因出內府錢分賜以為道里費

識小錄

洪武八年令中書省造大明寶鈔取桑穰為鈔料其制方高一尺濶六寸許以青色為質外為龍文花欄橫題其額曰大明通行寶鈔內上兩旁復為篆文八字曰大明寶鈔天下通行中圖鈔貫狀十串則為一貫其下曰戶部奏准印造大明寶鈔與銅錢通行使用偽造者斬告捕者賞銀二百五十兩仍給犯人財產若五百文則畫鈔為五串餘如其制而遞減之每鈔一貫折銅錢一

千文銀一兩其餘以是為差其等凡六曰一貫五百文
四百文三百文二百文一百文每鈔四貫易赤金一兩
禁民間不得以金銀物貨交易違者治罪告發者就以
其物給賞若有以金銀易鈔者聽凡商稅課錢鈔兼收
錢十之三鈔十之七一百文以下則止用銅錢會典

洪武八年詔造大明寶鈔時廣開錢局民間皆毀銅器
輸官鼓鑄甚勞奸民復盜鑄上以宋有交會法元時亦
常造交鈔及中統至元寶鈔易于流轉可以去鼓鑄之

害遂詔中書省造之

從信錄

洪武八年初上以西番產馬其所用泉貨與中國異自更錢幣馬至者少乃命成以羅綺綾帛并巴茶往市之

同上

洪武十年令各布政司復設寶泉局鑄小錢與鈔兼行

會典

洪武十五年設殿閣大學士上曰各官係侍從近臣例無所掌印信俱於翰林院到任十八年又命殿閣大學

士左右春坊大學士俱為翰林院官本院自學士下至孔目醵錢慶狀元於本院學士上坐及第三人生前之左講讀坐前之右餘皆傍坐後月三人同答席其第一人出錢倍於第三人皆舊典也

識小編

洪武十九年八月上覽宋史見太宗改封樞庫為內藏庫顧謂侍臣曰人君以四海為家何有公私之別太宗宋之賢君亦復如此它如漢靈帝之西苑唐德宗之瓊林大盈庫不必深責也宋自乾德開寶以來有司計度

支所缺者必藉其數以貸於內藏候課賦有餘則償之
凡有司用度乃國家經費何以貸為缺而許貸貸而復
償是猶為商賈者自與其家較量出入及內藏既盈乃
以牙籤別有名物叅驗帳籍晚年出籤示真宗曰善保
此足矣貽謀如此何足為訓太宗首開私財之端及其
後世困於兵革三司財帛耗竭內藏積而不發間有發
緡錢幾十萬以佐軍資便以為能行其所難皆繇太宗
不能善始故也

從信
錄

洪武二十二年令造小錢一十文至五十文以便民用
每生銅一斤鑄一百八十折二錢八十當三錢五十四
當五錢三十二當十錢一十六

同上

洪武二十二年上賜王弼緡錢五萬造第鳳陽鈔二千

錠與葺先塋

同上

洪武二十三年令各司府提調正官監督官攢人等盤
點在庫一應錢帛若金銀錢鈔并疋帛零段解赴京庫
鹿廳重什物及銅錫鐵器收貯備用不堪瑣碎物件當官

燒毀舊破衣服給付孤老仍俱開數目稽考

洪武二十三年復定錢制每小錢一文用銅二分其餘

四等錢依小錢制遞增凡鈔一貫准錢一千文

俱會典

洪武二十四年賜長興侯耿炳文緡錢五萬造第鳳陽

鈔二千錠與葺先塋黃金四錠白金四十錠鈔一千錠

彩段三十表裏優老于家

從信錄

洪武二十七年罷寶鈔行用庫錢令軍民商賈所有銅

錢有司收歸官依數換鈔不許行使

洪武二十七年令各處城市沒官房屋但係軍官軍人

住者不許取賃錢

俱會典

洪武建文間文武百官俸給皆以米間有以錢鈔兼支

者非其常也

識小編

洪武乙卯年庫錢忽飛一日南臺民家屋皆有錢墜立

在瓦上家家各以竹穿其孔中貫之或得一二十文

木州

子

凡錢法設立寶源等局鼓鑄洪武通寶銅錢與大中通

寶及歷代銅錢相兼行使折二當三當五當十依數准
算民間金銀米麥布帛諸物價錢並依時值聽從民便
若阻滯不即行使者杖六十其軍民之家除鏡子軍器
及寺觀菴院鐘磬鐃鈸外有應廢銅並聽赴官中賣每
斤給價銅錢一百五十文若私相買賣及收匿在家不
赴官中賣者各笞四十

刑書

凡私鑄銅錢者絞匠人同罪為從及知情買使者各減
一等告捕者官給賞銀五十兩里長知而不首者杖一

百不知者不坐若將時用銅錢剪錯薄小取銅以求利

者杖一百

同上

凡印造寶鈔與洪武大中通寶及歷代銅錢相兼行使其民間買賣諸物及茶鹽商稅諸色課程並聽收受違

者杖一百

同上

建文三年免民賃舍錢

吾學編

永樂九年令差官於浙江江西廣東福建四布政司鑄

永樂通寶錢

會典

宣德元年公宗廉恥抑奔競別賢否示勸懲一新條教
變士習諸生貧不能婚病不能醫死不能喪者節縮餐
錢力為贍給督諸生讀書興寢有常燈光達旦書聲不

絕恩義浹洽不啻父子

吾學編

宣德五年上命戶部兵部議至是戶部郭資兵書張本
等言於緣河屯田實為便宜自鳳陽淮安以北及山東
河南北直隸近河二百里內通舟楫處擇荒田驗丁冊
令官給以牛仍支官錢收買農器如此則軍民樂於用

力但山東近年旱饑流民多復故業官軍亦多有差役
宜先遣官往同有司按視田地以俟開墾上從之

皇明從信

錄

正統三年公又上疏言饑民流徙就食臣分遣屬吏沿
河贍賑每遇過州令出米為粥分給賴存活者一百八
十五萬八千五百人勸諭富有力量家出米麥穀粟二十
五萬七千三百石銀三千六百七十兩錢綿布半之量
給被災者五十五萬七千四百七十九家缺農具種子

七萬四千三百九十七家亦以官物賑給民流去撫來
復業者五千五百九十三家他境流冗安輯者萬六百

餘家

莊毅公
王竑

正統四年差給事中并戶部主事於各布政司會同按
察司直隸會同巡按御史盤驗各庫贓罰凡金銀珠翠
及紵絲羅段成疋堪中者起解京庫如不成疋及衣服
器皿之類准折本處官員俸給其餘銅錢硫黃解工部
軍器發附近衛所領用

忠宣公
黃福

景泰元年八月初二日楊善等至敵營額森見善等至甚喜許送上皇還京有平章恩克問有何禮物來迎皇帝善曰太師仁義克順天道敬我君父故送還豈為財物乎此舉萬代瞻仰若將財物來後人說太師愛錢了額森曰都御史說的是恩克說不合理我只圖垂名後世耳

皇明從
信錄

景泰二年時帝嘗以銀豆金錢等物撒地令宮人及內侍爭拾為閨笑編修楊守陳賦銀豆謠但未達於上耳

從信
錄

景泰四年令民間將銅錢折鈔阻壞鈔法者依律究治

會典

天順四年令民間除假錢錫錢外凡歷代并洪武永樂
宣德銅錢及折二當三依數准使不許挑揀

成化元年令各處船料鈔俱錢鈔中半兼收每錢四文
折鈔一貫

成化元年令京城九門并都稅宣課等司及各處商稅

等項課俱錢鈔中半兼收每鈔一貫折收銅錢四文

俱同

上

成化三年令內外課程俱錢鈔中半兼收如該納一貫

者止納鈔一貫不在兼收之價商稅課程船料等項鈔

一體兼收銅錢該起運或支給者相兼撥付每一貫收

錢四文除破碎并錫錢其餘不拘新舊盡數驗收

會典

成化六年令每鈔一貫折收銅錢二文

成化十三年奏准私鑄銅錢為首并匠人依律論罪為

從者問罪用一百斤枷枷號一箇月民匠舍餘發附近
充軍旗軍調發邊衛食糧差操若販賣行使者亦枷號
一箇月照常發落

成化十五年令各處戶口食鹽門攤等項鈔貫須錢鈔
相兼收受買辦物件賞賜節錢等項亦要錢鈔相兼支
放各處納戶如果本地原無本色帶有輕齎來戶收買
聽令照時價易換

成化十六年奏准各處額徵絲綿折絹戶口食鹽鈔錢

司府掌印官務嚴加督責各該州縣官監收本處織造
絹疋堪中錢鈔責令大戶領解委官管押仍先於內混
取絹一疋鈔五十貫錢五十文包封印記順附公差人
役送部收候比驗仍作正數送納其解到錢鈔絹疋比
驗以十分為率如一分不堪者罪坐州縣三分不堪者
罪坐本府五分以上不堪者罪坐布政司各經該官吏
若委官大戶抵換者依律問罪不堪錢鈔絹疋盡數沒
官

成化十六年奏准京城九門及都稅司宣課司等衙門收錢照律除破碎并偽造錫錢不使外其餘不拘年代遠近但係圜圖錢即便行使不許刁難挑揀阻滯錢法仍出榜禁約及令兩廠并巡城御史等官用心緝訪如有揀錢并偽造之人拏送法司枷號滿日究問

成化十七年令京城內外軍民人等買賣交易止許行使歷代及洪武永樂宣德舊錢每錢八文折銀一分八十文折銀一錢不許將新造私錢攙和阻壞錢法如違

及販賣并私造之人枷號依律照常發落有能告捕者
官為給賞鄰里人等知情不舉者事發連坐仍行南北
直隸及河南山東等布政司府行錢地方通為禁約

成化初贈太保謚忠宣公秉心正大義利介然天下士
大夫無論識不識皆知其為君子斥奸闕諛無所顧忌
憂國忘家老而彌篤俸賜分贍姻族屬續之日室無百

緡

俱同上

成化時羅倫慷慨樂善遇事無所迴避以犯顏敢諫為

先救時行道為急於富貴利達澹如也楊文貞作相時以百官祿薄得受皂隸折薪錢自是遂以為例獨倫不受既辭疾歸結茅居於金牛山取給於隴畝不受餽遺

日與學者講學垂十年而終

皇明從
信錄

成化間翰林陳師召所乘盲馬售錢六百文李西涯以詩諗之有斗酒杜陵堪再醉之句蓋用子美三百青銅語也時刑部李若虛舊屋為積潦所壞數年不售竟得銀四兩西涯亦諗之以詩云詞林馬價知多少即前師

召事也

同上

弘治元年令河西務臨清等八處鈔關淮安揚州臨清
蘇杭劉家隔正陽鎮各稅課司局與天下戶口食鹽俱
折收銀兩每鈔一貫折收銀三釐每錢七文折收銀一
分解京庫其存留者折支官軍俸糧每銀一兩折鈔七

百貫

會典

弘治元年令京城九門宣課都稅司順天等八府并山
東河南二布政司戶口食鹽全收鈔貫淮安臨清揚州

蘇州杭州九江等板閘船料鈔關俱令鈔錢兼收送庫
支用

弘治元年公先後在國學律已率人嚴立規約兩監中
故有羨金公盡籍於官均贍僚屬構書樓東西庑諸經
史刻北監廟街湫隘益市地闢其斜側又市廬舍三十
餘區居博士助教諸學官諸生貧者贍給死者賻襚皆
出羨金不私入一錢

文肅公
謝鐸

弘治元年八月擢湖廣按察使楊繼宗為左僉都御史

巡撫雲南繼宗山西陽城人爲嘉興知府止帶蒼頭一人如旅寓然滿九載老幼遮道留之不忍捨去陞浙江按察使憲綱振肅初蕃臬諸司所用取辦于下鎮守之官供給日費萬錢繼宗一切革去之陞右僉都御史

皇明

從信
錄

弘治元年九月何喬新題有云國初定律之時鈔重而物輕經今百有餘年鈔輕而物重要將銀每一兩銅錢每一千文各估鈔四十貫揆之時估固爲有理但銀錢

估鈔行之已久合仍依原估其他一應貨物委有估計失當臣等再行斟酌計議務在輕重得中另行具奏定

奪

皇明經
濟錄

弘治年馬文升題裨益治道有云皇上嗣登寶位賞賚未周而內藏已蕭然矣乞勅戶部如何措置使之充盈或造鈔貫或鑄銅錢凡理財之方足國之計無擾於民有益於國者宜從計處具奏定奪

同上

弘治六年令各關照近時則例每鈔一貫折銀三釐每

錢七文折銀一分

會典

弘治七年議准今後九江府鈔廠兌收銅錢只折收銀兩

弘治十三年奏准在京在外稅課司局批驗茶引所但一應稅納錢鈔去處着令客商人等自納若權豪無藉之徒結黨把持攔截生事及將爛鈔低錢搪塞攪擾商稅者問罪枷號三箇月發落

同上

弘治十七年四月章懋疏有云本年五月內據應天府

都稅司連申自願折納肉價銅錢行據各班堂長呈稱
若如所申委的兩便隨呈南京定奪查得國子監通志每
人每日乾魚二兩而本監案卷數十年間止是三日二
兩又查得北監有給錢鈔事例亦係折納合從每日二
兩之例分給乞酌量中價止令折納此事雖小寔亦積
弊之不容坐視者也

皇明經
濟錄

弘治十八年四月初七日臣東陽病起上召至煖閣袖
出數十指一本云太常寺欠行戶錢鈔昨有旨查洪武

等錢緣何市不通使戶部查覆未明仍須別為處置務使通行臣健等皆對曰此須自朝廷行起如賞賜折俸之類在下如鹽鈔船鈔亦用舊錢乃可通行且民間私鑄低錢聽其行用本朝通寶乃不得行誠非道理臣遷對曰昨令查正欲通行但私錢不禁則官錢決不能行前年鑄弘治錢曾禁私錢不二三日即濫使如故上曰何故如此皆對曰只是有司奉行不至上曰今須嚴禁臣東陽奏曰臣等訪得今所鑄錢徒費工料得不償失

亦是有司不肯盡心若止如此雖鑄何益臣遷曰昨令查已未鑄造數目亦是此意上曰然臣健等因奏曰今國帑不充府縣無蓄邊儲空乏行價不償正公私困竭之時鑄錢一事最為緊要其餘者屯田茶馬皆理財之事不可不講也

同上

弘治十八年令兩京內府司鑄等庫及南北直隸府州并十三布政司查盤洪武永樂宣德等錢并鑄完弘治通寶發與太常寺等衙門買辦等項支領及折與軍衛

有司衙門官吏旗軍准作俸糧并柴薪皂隸等項之數
不許留難刁蹬致悞街市行使仍行內外問刑衙門及
稅課司等衙門照例一半收歷代舊錢一半收洪武等
錢如無洪武等錢者折舊錢二文以示懲罰在內緝事
衙門并巡城御史兵馬司在外巡按官務要嚴加訪察
有擅自阻當及私自鑄造并知情買使者照律例施行

會典

弘治年倪岳陳言有云南京馬快船專備裝載官物之

用近年以來差使浩繁駕船夫戶艱苦不可名狀如南京例該運黑沙洲蘆柴就派水夫各自砍裝交柴之際索取每柴一束錢一文柴滿千萬則錢亦滿千萬錢不敷者多方刁難人夫逃竄船隻廢壞職此之繇

皇明經濟錄

正德五年題准將新鑄鉛錫薄小低錢倒換皮棍等項各色盡革將洪武永樂洪熙宣德弘治通寶及歷代真正大樣舊錢相兼行使

會典

正德七年令正陽門等七門門官凡日收大小車輛驢

贏駝馱錢鈔眼同戶部官吏監生照依則例收受即時
附簿錢鈔簿籍俱封貯庫不許縱容門軍家人伴當出
城羅織商客阻截車輛索取小門茶果起籌等項銅錢
正德七年令職官折色俸給以十分為率一分折錢九
分關銀及在京九門稅課在外各鈔關并官府買辦估
價里中收受錢糧俱收舊鈔與國朝銅錢相兼使用

正德年劉大夏疏有云給事中張弘至指揮羅永高壽
各開款建言門官不分班次一槩科擾直軍要行定與

班次免致混擾本部逐款議得各門因是近年定與網巾銅錢以致百計需索至有菜蔬錢掃帚錢上樓等錢然始猶止於該直官員以後一槩混擾訪得午門等門每三日一直用錢一萬四千五百餘文東華等門每三日一直用錢一萬九百餘文玄武等門每三日一直用錢一萬二千一百餘文東華西華玄武等門又有出車使用比之前門濫取尤多致令軍士月糧直米俱不得用妻子凍餓各官欲令分班意正在此開款題奉孝宗

皇帝聖旨這事件着各該衙門查奏定奪

皇明經
濟錄

又李承勲疏有云竊惟皇城內外禁守衛之設非止肅儀衛以壯國威寔以嚴關防以消奸宄近來廢弛似為殊甚臣每一巡點一門一舖官軍見其見在者身無完衣逃亡者每為過半詢察緣由或因網巾錢少不敢過班或以拖欠班錢借貸不到前番點視如此後番來點亦然雖其量為責治其弊仍前備求其故蓋因守門人員數多每軍過班三日即退銅錢百文作為網巾之名

此外又有聽事掃帚擡桶等錢科索多端軍士辦納不
前只得扣除直米充賣月糧甚至借貸筆楚誅求殆無
寧日前項軍士皆無恒產多係傭工手藝為生縱無家
口之養歇役三日豈能辦此錢數日朘月削以至貧窮
到骨繼以逃亡致使守衛日弛門禁不嚴若不密為計
處將來之弊有不可言者矣

嘉靖三年令戶部出給榜文曉諭京城內外買賣人等
今後只用好錢每銀一錢七十文低錢每銀一錢一百

四十丈着緝事衙門及五城御史緝訪違犯之人發人煙處枷號示衆

嘉靖四年令宣課分司收稅每鈔一貫折銀三釐每錢七文折銀一分查照應納課程收送內承運庫以備光祿寺等衙門買辦應用

嘉靖六年又議准各監局官吏今後解到錢鈔准兼收洪武永樂等錢遇光祿寺買辦物料行令順天府各舖行所屬州縣衙門將一應起運戶口鹽糧并船料商稅

門攤等項兼收洪武永樂宣德弘治銅錢進納民間交易一體遵行敢有把持行市不遵行使者以違例罪名

加號示衆

俱會典

嘉靖六年奏准鑄造嘉靖通寶一千八百八十三萬四百文南京寶源局鑄造二千二百六十六萬八百文每文重一錢三分

嘉靖六年五月京師雨錢

皇明從信錄

嘉靖六年秋命議鹽法錢法戶部尚書鄒文盛因條鹽

法五事曰禁私鹽曰禁占窩曰禁奏討曰明限制曰添刷引錢法二事曰遵錢制曰禁私販上納之

同上

嘉靖九年五月帝覽羣議曰分祀良是乃建四郊一時營剏工值浩繁大司農金錢皆匱

嘉靖十二年冬市人劉東山者素陰狡與黨陳大紳偽為疏恫喝鶴齡得且萬金猶時時有所需或不酬乃誣延齡怨望咒詛盜大內金錢通慈慶侍人以變告帝大

怒逮詔獄

永陵
信史

嘉靖十四年又題准寶源吉慶二店并福德等五店錢鈔俱中半折銀每鈔一千貫折銀四錢每錢二十文折銀二兩八錢六分每二十兩傾成一錠內寶源吉慶二店按季解部聽候年終類進福德等五店按季解府聽候取用及太常寺光祿寺支用

嘉靖十九年題准量發制錢數百萬文給大同鎮官軍折俸

嘉靖二十年冬本兵議遣大臣總督薊遼帝特命以胡

守中為兵部侍郎及至鎮乾沒帑財伐塞上古松數萬株謂便于哨探而邊騎長驅遂無扞蔽復索富商宿將金錢巡按洪源劾之亦不報至是諸臺諫連疏入帝怒

命收訊之

永陵
信史

嘉靖二十三年題准揚州淮安府杭州三處鈔關將船料銀一萬二千兩解送南京工部幫助鑄造制錢

嘉靖二十八年議准軍民交易洪武永樂宣德弘治嘉靖制錢并歷代銅錢相兼行使敢有私鑄鉛錫假錢并

客商解人販賣解納者照例問發

嘉靖三十二年議准洪武通寶有當十當五當三當二之制見今堪用者復有一錢七十文一錢一百四十文一錢二百一十文三等任從民便相兼行使

嘉靖四十一年題准崇文門宣課分司商稅照舊折收銀兩自本年冬季為始照例每鈔一貫折銀三釐每錢七文折銀一分

俱會
典

嘉靖四十四年五月戶部歲發鹽課二萬兩於雲南鼓

鑄嘉靖通寶既而錢法阻滯公私交病巡按御史言鑄錢不行繇蓄積未通也而利少費多且行錢准銀不宜泥以定數而收稅折俸皆利於銀宜止勿鑄從之

皇明經濟錄

嘉靖間又令曉諭京城內外行戶人等今後除私鑄新破鉛鐵等項首官易買不用外但係圓圖中樣舊錢每一百四十文准銀一錢與洪武永樂等錢隨便行使

嘉靖間又令曉諭京城內外商賈及鋪行人等但有收積新錢限一月內盡數赴府縣并各城兵馬司出首具

呈戶部照銅價給與價銀免其私販之罪例後敢有隱藏不出首者事發比照私鑄銅錢為從者例問罪枷號發遣其大小舖行仍前盜買販賣一體究治收過新錢即與銷化貯庫聽鑄造大明通寶取用

嘉靖又令工部查照永樂宣德年間事例差官於直隸并河南閩廣鑄造嘉靖通寶解京貯內府司鑰庫給軍折俸并給光祿寺買辦物料每錢七百文准銀一兩

嘉靖間又題准錢法行使悉依歷代年號隨錢高下咸

得通行但有銷鎔舊錢及今鑄錢造作銅像銅器等項者比盜鑄律科斷四十三年以私鑄盛行錢法阻滯令內外各衙門嚴加訪治寶源局匠役人等侵料減工致輕小濫惡不堪行使者該部拏送法司從重問罪以後該局鑄造暫行停止戶部每年將南京雲南及稅課司解收好錢一千萬文送部轉送司鑰庫以備賞賜之用

嘉靖間茶法奏狀今後園戶賣茶及茶商興販茶貨告給引繇與夫批驗納課等項務要俱遵引繇條例數內

惟買引一事免其納錢

嘉靖年茶法奏狀一茶引繇內茶引一道納銅錢一千
文照茶一百斤茶繇一道納銅錢六百文照茶六十斤
見行事例每引繇一道納鈔一貫中夾紙一張

嘉靖年梁材鈔關議令各該鈔關委官主事將經過軍
民船隻應納錢鈔自嘉靖八年十一月初一日為始照
例每鈔一貫折銀五釐每錢七文折銀一分

皇明經
濟錄

嘉靖甲申三月僉事林希元上荒政叢言言救荒有二

難曰得人難審戶難有三便曰極貧民便賑米次貧民便賑錢稍貧民便賑貸有六急曰垂死貧民急饘粥疾病貧民急醫藥病起貧民急湯米既死貧民急墓瘞遺棄小兒急收養輕重繫囚急寬恤有三權曰借官錢以糴糴興工作以助賑貸牛種以通變

從信錄

隆慶元年令買賣貨物值銀一錢以上者銀錢兼使一錢以下者止許用錢國朝制錢及先代舊錢每八文折銀一分不許任意低昂其崇文門稅錢并太倉收貯南

京解錢給與在京各衙門官吏為折俸之用以後按季銀錢兼支崇文門課鈔除該銀三兩以上者收銀其三兩以下者及九門各城房號行戶俱令收錢行使

隆慶二十年六月山西巡撫靳學顏理財疏云大行鑄錢之法以通融於五穀之外重積貯之令以盈虛於豐歉

之門

昭陵
信史

隆慶三年令南京刑部通行各該問刑衙門以後如遇抄沒贓物內除違禁細軟等件遵例解京并歲額錢鈔

仍照舊外其餘一應龐重贓物并贖罪銅錢徑解南京戶部貯庫會官估計酌量支放明立文卷照刷其見在貯庫贓物盡數查出會估酌處支銷

隆慶四年令以新鑄隆慶通寶送戶部發太倉庫量放

京官折俸

會典

萬厯四年題准通行天下開鑄制錢與本地方舊錢相兼行使着各撫按官設法經理務在便民毋致勞擾

同上

萬厯四年題准行雲南布政司督令所屬開局鑄錢遵

照新制萬厯通寶與國朝制錢相兼行使以佐海肥之
用臨清本色鈔一千二百六十萬餘貫錢二千五百二
十萬餘文折色船料商稅正餘銀八萬三千八百餘兩
許墅本色鈔五百八十六萬餘貫錢一千一百七十三
萬餘文折色船料正餘銀三萬九千九百餘兩九江本
色鈔二百九十三萬餘貫錢六百八十九萬餘文折色
船料正餘銀一萬五千餘兩杭州本色鈔一百九十萬
餘貫錢三百八十一萬餘文折色船料商稅正餘銀三

萬六千八百餘兩淮安本色鈔三百萬餘貫錢六百萬
餘文折色船料正餘銀二萬二千七百餘兩揚州本色
鈔一百六十九萬餘貫錢三百三十八萬餘文折色船
料正餘銀一萬二千九百餘兩

萬歷五年令崇文門收稅除二兩以下者盡數收錢二
兩以上者亦銀錢中半上納京城各門稅課五城兵馬
司房號等項盡數收錢其文武官員支俸照例銀錢關
給外餘各項商人應領料價量擬銀八分錢二分并行

支給

萬曆六年覆准將嘉靖隆慶萬曆制錢遵照前奉欽依
每金背八文准銀一分火漆鑄邊各十文准銀一分洪
武等項與前代舊錢各十二文准銀一分相兼行使

萬曆六年常州府鈔三萬四千九百八十一貫九百五
十五文銅錢六萬九千九百六十四文解南京戶部

萬曆六年課鈔順天府九門并都稅等司門攤課鈔六
十六萬五千一百二十貫銅錢二百四十三萬二千八

百五十文崇文門宣課分司商稅大約銀共一萬九千八百一十六兩銅錢一千八百八十七萬七千七百文條稅大約銀一萬五千九百九十六兩船稅銀四千五百一十五兩通州張家灣宣課司商稅大約銀三千零九兩銅錢二百八十八萬七千七百六十文麴一十五萬二千八百斤條稅銀一百五十五兩六錢船稅銀二十二兩七錢常州府稅課等鈔二十四萬二千八百六十六貫八百七十一文銅錢四十八萬五千七百三十

九文滁州稅課等鈔五萬三千九百五十六貫三百一
十文銅錢五萬三千九百五十八文

萬厯七年四月詔停鑄時上方以賞賚缺資命主計鑄
大錢進用京師小民多積嘉靖錢訛言止行萬厯新錢
不行舊錢人情甚以為不便且取外府之儲以充內庫
失舊制矣閣臣力請停鑄上命罷之

皇明從
信錄

萬厯八年題准雲南地方既不用錢不必鑄造其在庫
錢着貴州差人于該省搬取以充兵餉之用

萬曆十年詔各處開局鑄錢地方暫行停止如錢法疏

通願仍前鼓鑄者聽從其便

俱會典

萬曆間又令崇文門稅銀自三兩以下盡數收錢三兩以上銀錢中半兼收

萬曆辛亥閣臣疏云竊惟遼東積弱之後有此一捷稍覺生氣而現在之窺伺報復勢正熾盛甚可為慮則夫捐一二萬之金錢以激勸吏士使之感恩用命相率而死敵此亦機之必不容緩者也

萬歷時孫一謙溫麻人已丑間為南都官司獄能不以
獄為利于囚甚有恩故事重囚米日一升率為獄卒盜
去飯以不給又散時強弱不均至有不得食者即訟繫
囚初入獄獄卒驅之濕穢地索錢不得錢不與燥地不
通飲食而官因以為市一謙知之一切嚴禁手創一秤
秤米計飯日以卯巳時持秤按籍以次分給食甚均又
時時見囚衣弊為浣濯補葺令完善視輕繫之尤餓者
予囚飯之半囚得不死獄卒無敢橫索一錢者

三司
獄傳

萬厯乙卯戚繼光鎮薊所駐三屯置庫隘稍拓之并及
文武廟梵宮道院南山有碧霞景忠諸壇望之縹緲
若在雲端有香錢簿取佐軍資公不入一錢皆以飭材
具有東湖因濠為險導以資灌溉護以柳堤有魚蝦菱
芡之利荷亭采鷁可供遊賞

小品

錢通卷一

欽定四庫全書

錢通卷二

明 胡我琨 撰

正朔一統二

今山西無礦可開無錢可鑄以鹽法則盡通矣以屯田則盡闢矣以耕作則盡力矣而財用之詘乏日甚臣謂除節省外無策焉

靳學顏疏

臣又見近世之言理財者曰財無從生也惟有節費而

已臣以前代生財之法較之今日尚缺一大政焉臣舉此一大政何謂其無從生哉而錢法是已臣聞人之所繇生衣食為大王者利用厚生必先乎此此出于天時地利人力相待而共成三才之用者也有此三才即有此布帛五穀增虧相乘有無相貿而非有水旱之災兵革之奪癘疫之妨以一歲之功而供一年之日用自周也今天下之民愁居懾處不勝其束濕之慘司計者日夜憂煩遑遑以匱乏為慮者豈布帛五穀不足之謂哉謂

銀兩不足耳夫銀者寒之不可衣饑之不可食又非衣食之所自出也不過貿遷以通衣食之用爾而銅錢亦貿遷以通用與銀異質而同神者猶雲南不用錢而用海巴三者不同而致用則一焉今獨奈何用銀而廢錢惟時天下之用錢者曾不什一而錢法一政久矣其不舉矣錢益廢則銀益獨行銀獨行則豪右之藏益深而銀益貴銀貴則貨益賤而折色之辦益難而豪右者又乘其賤而收之時其貴而糶之銀之積在豪右者愈厚

而銀之行於天下者愈少再踰數年臣不知其又何如也則錢法不行之故爾計者又欲開礦夫礦不可開開蓋無益也一禁而不可弛弛則亂矣臣試根極錢說而司計者擇焉臣聞錢者泉也如水之行地中不得一日廢者一日廢則有枯槁之虞從成周而漢唐宋以來見之史籍一一可覩未有用銀廢錢如今日之甚者也而用錢之多鑄錢之盛者尤莫如宋故宋太祖欲集錢至五百萬而贖山後諸郡于遼靖康中趙良嗣奉使歲加

稅銀一百萬于金其平時賂契丹寧夏也歲幣率有常額其外國亦用錢可知又宋之饒州處州江寧等處皆有鼓鑄之地今江南人家嘗有發地得窖錢者則無南北皆用錢可知其餘書文所嘗言幾百萬無慮鉅萬累鉅萬之說率多以錢計臣亦不暇枚舉今去宋不遠故所用錢多宋之物夫用錢則民生日裕鑄錢則國用益饒此裁成輔相之業惟人主得為之故曰聖人之大寶曰位因位而制權因權而制用故又曰錢者權也人主

操富貴之權以役使奔走乎天下故一代之興則制之一主之立則制之改元則制之軍國不足則制之此經國足用之一大政也奈何廢而不舉臣竊聞江南富室有積銀至數十萬兩者今皇上天府之積亦不過百萬兩以上若使銀獨行而錢遂廢焉是不過數十里富室之積足相擬矣皇上試一舉其權而振之則彼富室者智勇豪俊者將奔走于吾權之不暇彼敢冒萬死而盜鑄吾一文者哉故曰權也權者立之乎無形而達之乎

無窮用之則天下舉有求於我而有餘不用則日擾擾
焉以求之於天下而不足為驗甚明也且夫富貴其權
一也皇上今出數寸之符移片紙之檄以匹夫而拜將
相焉又能使同姓王異姓侯焉于公帑未有損也此馭
貴之權若是乎其易也若乃今日與人以千金焉明日
與人以萬金焉曾不踰年而太倉告匱矣夫何馭富之
權若是乎其不侔與誠以有其權而不用與無權等爾
昔漢文帝之寵鄧通也曰吾能富之賜以蜀山之銅而

鄧氏之錢滿天下夫鄧氏之錢滿天下則天下之貨萃於鄧氏明矣吳王濞擅鑄山之利而輒稱兵漢廷與之抗亦不過竊漢廷之權明矣夫以竊一日之權尚足以得民而抗漢況以萬乘而自振其權可勝用哉今之為計者謂錢法之難有二一曰利不酬本所費多而所得鮮矣臣愚以為此取效于旦夕計本利於出入蓋民間之筭非天府之筭也夫天府之筭以山海之產為材以億兆之力為工以脩潔英達之士為役果何本而何利

哉此所謂本猶不免用銀之說爾臣所謂本蓋無形之權是已何則鑄錢之須一曰銅料一曰炭一曰轉致一曰人工夫此四者在民間計之銀一分而得錢四分誠十不酬五矣自臣愚計之皆可不用銀而取辦者誠將天下出產銅料之處贖軍徒以下之罪而定其則以收銅于西山產煤之窯以法司有罪之人而准其罪以納炭其運銅則通水路者附以官民之舟如臨清帶甌之例通陸路者資以驛遞之力而給之官庫之錢其運炭

則請出府庫見貯之錢或于京城或于近縣或于營軍如係官身則量給以工食如係民戶則平給以腳價如是而患無材與夫轉致之難臣不信也至于人工取之見役而皆足則又不煩銀兩而可辦也臣不知工部及寶源局原額匠役若於見今坐食與否耶即以營軍九萬人論之抽用其一二千人足矣而謂妨訓練耶今京城之內鍛金刺綉聲技力作之徒與夫靠衙門而衣食者孰非營軍奚啻一二千也而未嘗患其妨凡此皆不

用銀而可以成務固無本利之足較矣其二曰民不願行強之恐物情之沸騰也臣愚以為歷代無不用之至稱為錢神我先朝又用之祇見其利不聞其病正德嘉靖以前猶盛行之蓋五六百而值一兩今七八十歲人固多尚可一召而訊也獨至于今屢行而屢廢甫行而輒輟焉何哉臣竊詳之錢比鈔異于小民無不利也獨所不便者姦豪耳一日盜不便一日官為姦弊不便一日商賈持挾不便一日豪家蓋藏不便此數不便者與

小民無與也臣竊聞往時但一行錢法則輒張告示戒
廠衛不先之于賣菜之傭則責之以荷擔之役愚而相
煽既閉匿觀望之不免而姦豪右族依托城社者又從
旁簧鼓之以濟其不使之私一日而下令二日而閉匿
不三四日而中沮矣務大計者宜若是其易動哉臣聞
施恩澤者自無告始行法令者自貴近始豈惟貴近自
朝廷始可也請自今以後追紙贖者除折穀外而責之
以納錢上事例者除二分納銀外而一分以納錢存留戶

口則兼收錢穀商稅課程則純用收錢此謂自朝廷始
又因而賜予之費宗室之祿百官之俸則銀錢兼支又
因而驛遞應付雇夫雇馬則惟錢是用又因而軍旅之
餉則分其主客量其遠近或以代布花或以充折色此
謂自貴近始矣此數者有出有入而民間無底滯之患
誠以上下交會血脉流通故也輕歛輕散官府有餘積
之藏誠以正賦之銀既以無減于常額而一切之費又
取辦于一權故也此權不可行之于天下以啟盜權之

釐請于寶源局或西倉專設侍郎或即用左右侍郎一員督于上以十三司員外或主事分理十三省事于下以科道各一員監之銅料工材各有攸掌各省欵散一照分司先之以區畫條議計定而行而又輕重適均無駭于俗仍以唐宋以來舊錢兼之或上有施于下或下有納于上著之以必行之令遲之以歲月之效久之而本末兼利公私循環可以輟鼓鑄之勞而罷工作之使臣愚不揣竊謂千慮一得也昔我祖宗初制鈔時下令

甚嚴有以金銀貨物交易者輒沒給告者然不徒責之也後又令各處稅糧課程贓罰俱准折收鈔則聖意淵微可測矣此固血脉流通之意所謂泉也而法以佐之所謂權也夫帝王以元氣為索鑰以造化為錘鑪而風行神運不言所利乃至與齊民賈豎筭本利較銖鎰臣愚非所望也

同上

迺若通民財用者蓋今民之困窮極矣錢法通行于民最便今不但南方未有行者即輦轂之下且阻格焉臣

等伏思官以錢為稅則民未有不以錢為用者其在京
須要責令崇文門查照舊法以錢為稅外凡各衙門納
官用皆須額定半銀半錢又必通行南北用錢地方凡
係存留本處納官官用銀兩並額定半銀半錢若素不
行錢地方限文書到日聽撫按官議處有能倡率錢法
通行者許撫按特薦量陞獎勵倘官有阻撓並令在京
巡城御史及內外巡按科道等官叅奏但錢之為用每
銀一分只額限換用嘉靖通寶六文其前代舊錢一視

往時貴賤用七分之一庶錢不過賤民皆樂用嚴立諭
禁不許故違有故違者當即重治更宜申重鑄錢之令
兩京工部添設鑄錢仍乞行令各省撫按轉行布政司
各特設鑄錢一局委官造鑄歲鑄若干存留該處府庫
歲終奏報所鑄之錢例鑄用大明通寶四字以便通用
嚴行天下每銀一分亦只用六丈夫錢法通則民困可
蘇民困蘇則國用可裕曰通民財用者蓋如此
魏時亮疏
臣愚以為水利為田而興則財力亦必計田而出凡有

田之家不拘官民每田一畝科錢一文每田一項科錢百文至田萬項科錢百萬文以浙西諸郡軍民田不啻千萬頃所出之錢可以類推而知也若然則不但積少成多抑且輕重易舉寔為經久之計

吳巖疏

國初竈丁辦鹽每引四百斤給工本鈔二貫五百文蓋洪武年間鈔一貫值錢千文故竈丁得寔利如是而冒禁賣私鹽可絞死也今鈔一貫不易粟二斗禁絕竈丁勿賣私鹽是逼之饑以死也此後來法行之弊非初年

之失也

霍 韜

今若立法使鈔一貫值錢十文竈丁為寔利則額鹽一大引給工本鈔二貫五百文餘鹽一小引亦給工本鈔二貫五百文各場餘鹽盡屬之官私挾私賣即處絞勿贖則兩淮正鹽七十萬引餘鹽三百萬引舉可召商開中或如永樂時例一引輸邊粟二斗五升可也或如成化時例一引折銀四錢可也

同上

一茶引繇內茶引一道納銅錢一千文照茶一百斤茶

繇一道納銅錢六百文照茶六十斤見行事例每引繇

一道納鈔一貫中夾紙一張

王制茶法疏

臣惟今天下號稱多事矣吏治日墮用人急焉而選法不善人將不得所用國用日匱理財急焉而錢法不善國將不得所利則今日吏部大選之抽籤南京工部鑄錢之增爐誠不可不議處者臣請為我皇上言之我國家以官人之柄付之吏部蓋責以別材賢弘化理也從未聞以選除大典憑之籤者自請託盛行而前吏部始

議用籤以矯其私意誠公也豈知籤一設則反為籤所
束南與北或相左矣人與地不相宜矣甚且選後而告
改者紛紛矣夫南北不宜害猶在一人也人地不宜不
害及郡邑乎害若此奈何猶拘拘然株守一籤也故籤
之當革不但如往時或簡籤或換籤為士人所閼鬪即
如銓曹責在知人止緣籤在而任抽之縱有月旦之明
何所用焉則器使之謂何而臣所謂選法之久敝者以
此我皇上酌鑄山之政付之工部蓋責以裕貨財前民

用也從未聞以鑄錢一事頓增多爐者自水衡告訕而南工部始議增爐以濟其用意誠善也豈知爐一增則反為爐所困今據告爐增至六百座矣銀七分五釐易錢百文矣甚且商賈畏行錢不敢入京矣夫多爐多利爐可加增也今爐多錢滯官民不交病乎壅閼若此奈何猶泄泄然不為之所也故爐之當減不但如近日錢止行之京不行之外為都人之大蠹即如工本之費不貲抵緣錢多而賤出之遂致利不償費國何益焉則持

籌之謂何而臣所謂錢法之大壅者以此夫邇來鑽刺成風臣方欲以白簡杜邪徑豈以抽籤革弊反欲去之以潰其防倉庫如掃臣恨不得以多方濟燃眉豈以增爐利用反欲減之以掣其肘良有見於吏部原號為銓衡必遴選羣材如衡之錙銖不爽而後可若徒用籤而不用衡使人謂銓部為籤部是之謂有選而無法臣竊為人材惜之蓋用籤以示公道孰若去籤而使公明之并用也故採之輿論咸以為革籤便財貨原謂之貨泉

必錢法流通如泉之流行不滯而後可若行錢而不類
泉使人視制錢如棄錢是之謂有錢而無法臣竊為耗
費惜之蓋多鑄以開財源孰若少鑄而使源流之無壅
也故稽之民情咸以為減爐便雖然臣有說焉朝廷原
自有大體在主官爵者當求得以報主恩自不當守
陋規以廢職掌况秉心誠公即請託何敢至前而區區
藉三寸之竹以謝人真同兒戲理財自有大道在司錢
穀者當求長便以充公儲不當持一端以為完計况稽

察誠嚴即節省亦且無筭而區區守數百之爐以坐困何濟時艱是又在當事者勉圖之耳以上二事臣有激於衷久矣且錢法通塞又該臣等每季具奏故不避嫌怨謹據事直陳如此知兩部之有識者當必有同心焉伏乞皇上勅下吏工二部再加查議吏部之籤南京工部之爐應否一革一減第革宜速革臣無容喋喋矣減雖徐減然亦宜設法能令處處行錢而後為得策總之俟兩部題覆請自聖裁庶人材各適于用而吏治日隆錢

法不至於壅而帑藏可裕其於用人理財未必無小補

矣

萬曆年李雲鵠疏

臣惟財用在民而利權之操縱則在上而不在民利權在上而奔走以導利則在民而不在上自古有一代之興必有一代之錢有一代之錢自供一代之用其間設法調停俾疏通而不滯者固自有道也仰惟陛下因錢法之難行不靳再三申飭言官之所建白部臣之所議覆不啻詳矣其在于今乃有未盡行者南京係都會之

區行未數月竟停壅而不達南京如此其在外府州縣可知矣毋怪乎噪攘者之紛紛也進言者以為私鑄之混官鑄也即今私鑄者且獲重遣矣以為新錢之濫惡也而舊鑄之堅厚者自在也一槩不行其故難知矣臣愚以為有二端焉價值之不歸一也督責之太驟也何謂價值之不歸一也發錢之初議有成價每銀一分或錢八文或十文行未幾八文者或改為十文矣十文者或改為十二三文矣匹夫持尺寸布粟入市易錢不至

盈百既而以錢易他物則其價又若干倍然矣自匹夫而上其積錢愈多則其虧本愈甚至積于無用能令不悔其始之受新錢耶欲望其行之久也難矣此其故皆起於市井壟斷之徒設計奇贏陰為轉移而致然耳伏乞敕下吏部轉行撫按衙門將各處官錢鑄合式之錢立為一定不移之價刊刻成數頒示中外毋致先貴而後賤毋致日異而月不同而市井壟斷之徒嚴為體訪懲一警百若是而錢不行者未之有也何謂督責之太驟

也鑄錢一出則官府急急焉速為示諭某項給錢某項
納錢某項不許收錢某項不許並用有不若令者刑罰
且隨之愚民轉相淆惑以為今日之使新錢非正直也
乃官府以法驅之也他日官府一弛錢將焉用也此其
所以展轉趨而錢日壅也夫以銀易銅以銅鑄錢錢即
銀也何至以刑威迫而使之重自疑畏也伏乞敕下該
部轉行撫按衙門諭令各府州縣將新鑄萬厯之錢與
我朝列聖寶號之錢相兼行使不致舍彼而取此不致

遺舊以專新從容導引以期民之信從若是而錢有不
行者未之有也再照財者民之命也人情者聖王之田
也大學論理財而本之絜矩要之使民各得分願也曾
見雲南巡撫饒仁侃奏雲南一省自來不知錢法夷人
行使不通乞要照舊以安民俗奉聖旨雲南地方既不
用錢不必鑄造其見在庫藏着貴州差人該省搬取以
資兵餉價銀免解還欽此仰見陛下行錢之令原無成
心未嘗用此以苦民也五方風氣異宜膠于故常而駭

于新制恐不但雲南一省為然也伏乞敕下該部轉行
撫按衙門再加查核如原係行錢地方上緊着寔舉行
務在設法疏通倘有積習已久不便行使者不妨明白
開奏以便裁奪毋得隱忍遲回以釀厲階此寔用法之
深仁而亦順治之大權也統惟陛下留神俯賜施行

萬曆
年唐

商
疏

鈔關本色歸內庫以備錫予雖舊制也然自弘治以來
鈔之不與錢並使也非一日矣今本折雖輪征而賞鈔

無實惠查得隆慶元年曾改折三年以濟邊儲陛下今必欲照常解本色于內庫似非所以救時之急臣愚以為賞賜即無鈔人不為怨而停征本色且可以助國儲去無益以資有備戶部之請折鈔關者宜從也

萬曆年
譚希思

疏

天之生財原以流布于民間故錢者泉也布也取通融之義也乃皇上殘地脉而取之權關津以竭之日積月累二十餘年于茲矣寶玩黃白之物充牣山堆於宮中

雖假名鼎建猶未見有絲毫之給發也頃廷臣以邊儲
缺乏每勸皇上以頒發內帑而皇上撲滿之藏愈固也

萬歷時張
邦俊疏

臣等竊惟錢者天地間不涸之源不竭之府此昔人所
以取泉與布之意也然錢之用欲流布于民間而錢之
權不可令操之于民間也乃留都之錢法則太阿倒持
而自下操之矣此其故蓋難言之皆繇數年以來司鼓
鑄之柄者惟知為朝廷守帑藏不知為朝廷收利權南

中緡紳父老講及破格廣鑄以禁私錢輒稱錢糧未奉
明旨不敢輕發而不虞今日私錢之弊濫觴一至此極
也若不及今挽回則其禍更有不可言者然私錢不禁
則官錢必不可行官鑄不廣則私錢又不可遽撤幸南
京吏部侍郎署工部事史繼偕都察院僉都御史丁賓
應天府府尹今陞通政使陸長庚為國為民之心推
出同調相討究錢法之利弊而應天府例該鑄錢措置工
本千餘金鑄錢五十爐每爐三萬出示五城錢行經紀

領賣私錢與官錢不得同價而市井無賴棍徒輒倡言
物價騰湧乘機搶掠舉國若狂如鎮淮清橋等地方處
處有之搶攘之時正大京兆偶爾經過跟隨控訴略無
退避大京兆不得已乃借將都司家取牌出示曉諭而
衆猶徘徊觀望擁聚不散賴僉都丁御史傳呼中軍曉
以禍福聲言擒捕始駭然解散矣夫問私錢盛行之故
則以官錢之未廣鑄也問官錢不廣之故則以皇上吝
一俞允之旨而司帑者以事干錢糧恐文法之議其後

也孟子曰上無道揆也下無法守也朝不信道工不信
度其今日之謂乎懇祈皇上思利權之不可不收念私
鑄之不可不嚴除搶掠亂民臣等已嚴加緝拏候旨處
分外仍將部覆御史王萬祚疏通錢法一疏亟下南京
工部並會同各衙門酌議應動錢糧急為廣鑄一面候
旨一面增爐此勢如饑渴事在燃眉而萬不得已之權
宜也更望天語叮嚀申諭內外守備及五城兵馬務使
民間貿易出入俱要真正制錢其外來溷雜及私鑄假

錢等項令其銷燬為銅不許仍復攬行以滋騰湧行使
假錢者坐以私鑄之律濶用低雜減等枷號問罪巡緝
員役告捕得獲如律加賞縱容賄脫罪與犯同將閭閻
沾寔惠而無復巷議之萌矣都民幸甚臣等幸甚臣等
無任惶悚待命之至

萬歷年張
邦俊疏

所過河道有司以意起稅節節密如佈網官稅一番衙
門勒騙一番至於土人涉河索買河之錢過路索買路
之錢越山索買山之錢及至盤運到關從前橫雜使費

不啻什倍于正課矣

萬歷年傳
宗臯疏

臣聞錢之藏曰泉流曰布謂如水之流行于地民非此
不生活也古有五金惟錢最便乃聖王握三才之柄揅
五行之災以左右萬民莊山歷山之鑄贍民無餽賣子
者九府圜法流通四海太公曰知通塞之權是謂政之
大端矣管子曰與奪貧富皆在君上使人戴君如日月
親君如父母用此道也生殖衆則國富人安桑麻寡則
人貧國危權制之術寔在乎錢鍵其多門利出一孔可

致時雍豈止于富國強兵哉管子固通達國體者蓋天行之豐歉難定而銅無荒年物產惟金銀難得而銅猶易辦藉母生子以子代母民貧國貧猶依此為命司馬芝謂不獨豐國也且省刑真國家一大政非僅僅取充大庭之賞幣為大官給餼廩了簿書而已金陵固古行錢之地也太祖草昧即開鑄應天府後乃置工部局萬曆二十年以前猶六十爐已而添置四十爐又五十爐二十九年加置一百爐三十年戶部府軍倉附鑄加二

百五十爐應天府比例復置一百爐夫十年之間而添
爐如此其多者則豈不因地廣人衆四方湊集且外郡
仰資錢乏日費浩流行遠愈鑄而愈恐其不多哉三十
四年以來法在人亡司官見殊厭謂煩雜加以水災銅
商不前奏請停爐奉旨裁減鑄者百二十鑪分為兩番
一循環或每月一鑄或一季再鑄而民間私鑄之錢
出矣父老士民咸言四五年前官錢充裕不見私錢雖
稍稍互雜民猶惴恐今則都城內外充斥街市行使為

常恬不知怪詢詰其繇則官錢之價貴私錢之價賤入市買物止論文數畧無差別民性好利誰肯舍賤趨貴惟官錢停閣人不肯買勢不得不與私錢俱賤而外郡州縣止知官錢為遵制尚獲高價即戶工搭放盡出外易城中不能留而私錢乘我之虛伺民之急盤踞布散民方以為德莫之能禦矣每爐原設工匠七名停棄不用者約三千餘人止知鑄錢別無他技口食無資勢不得不投匭近地江南富豪任俠之家以其財為招募吳

鄧之風修陶計之術歸者如市其錢體薄文闇多雜以低料工力小斤兩輕每千費本銀五錢而賣至八錢以上取利立倍厚賞重酬嗜利釘盟甘為死黨官錢盡化為私錢我寔驅之曷足怪焉姦數不勝死罪下積輒經題禁奉有明旨五城御史非不日督兵馬司官搜捕經年無獲城外水關巡司運所責令密緝擒拏興販搬運私錢者姦徒陽分陰合走死地如驚神出鬼沒閉藏甚巧國門之外終日盤驗祛篋發囊則又貪官悍卒摩牙

奮爪反攫行客強有力者財神布置或假為京官太學
行李或指為外省公文損解躲閃萬態守卒明知暗賄
故脫即防之何能盡防也止有禁民間不得使用私錢
舖行經紀不許易換如此而已執經紀而責之曰爾何
以販私錢曰我非販也得之某貿遷化居肆中者也執肆
商而責之曰爾何以販私錢曰我非販也以零星賣物
聚而成多易銀作本舖舖皆然如此則家可論戶可罪也
臣巡視南北二城業與各御史科臣部臣于去冬會同

示禁而許以私錢作銅就工部領價民無慮者經紀不敢賣錢市門晝閉問之曰我非欲自絕生意也賣私錢則積之無用之地止可充黃銅且犯禁賣官錢則終日倚市門不得一文安用掉臂與人嘵嘵為于是百物之價轉騰湧饑者不得食寒者不得衣貧民大困百工技藝不得通工易事與私錢則工人有難色索官錢則主人謝無有其任負推輓奔走勞苦力作之人以手足為口急于得食者詣茶飯肆爐頭賣漿市胡餅之家皆慙

不肯與于是牧圉仆于驢擔夫呵于路擁司空之輿控
都院之馬藉令下讐上上必欲勝下不斃其性命則有
散之四方而已王道在順人情仁政先哀茆獨無論激
變即無辜之衆寔藉我撫循以生而忍于斃之逐之哉
何也官錢乏故也令人持三五金入市換工部制錢必
俟數日湊數家猶不能充彼貧民又奚望焉語曰民可
百日無貨不可一日有饑勢不得不聽從民使惟是賣
官錢者舊價每千易銀一兩命復其舊待工部廣鑄制

錢充盛之日私錢盡行革去夫高官錢之價者所以鼓之樂售第私錢仍在而未去是益策之使買私錢耳昔楚王更鑄大錢民盡去其業有司言市亂孫叔敖頓令復如舊而市定楚錢更小為大總屬官錢自為興輟非若今日犯法之錢漢臣所稱人主操柄不可與民共之者也惜貧民之命長姦人之膽巨猾亡命陰笑我為懦如國威何說者欲令民多用銀然小民止知有錢且各省用銀之處猶欲使之行錢今反易其俗而強人太難

亦不通之甚矣又欲以城內所鑄止留城內之用戒守門者毋得出然錢法本欲其通行不留而奈何壅之禁私錢之入則可禁官錢之出則不可故為今之計莫若廣鑄官錢我祖宗立局曰寶源水之源出于天地錢之源出于朝廷惟可以利名故人主寶之稱寶者謂其權重宜一而不分操而不置可先自棄為人所竊乎稱源者謂其流長宜廣而毋隘濬而毋塞可先自感導人為梗乎源泉混混不舍晝夜大可瀦為江河湖海小可分

為溪澗井坎隨汲隨得飲者充量藉令民不得水焦渴之極勢不遑擇甚至飲草木汁血溺污穢者亦不得已而然凡有慈憫之民知必迎西江汲東海之不暇況泉源伊邇而非遙上流洪洞而暫淤其疏闢開廣以救之耶抑絕其他飲而立視其死耶留都錢法何以異此伏乞敕下該部查照萬歷四年二十九年歷行諸例將存留銀兩量再添復舊爐勤鑄不輟應天府仍將現停百爐一同鼓鑄按尺籍名姓追呼舊匠各還舊役若揀選

不堪用者遞發本縣歸農收管田照則匠悉歸于公而私鑄之黨散矣法行自上始今留都文武百官日食蔬菜皆以銀易錢散買差役所易之錢即街市現行錢也此官府不免用私錢而況民乎今宜令各衙門經歷司官以大小員屬每計俸薪之半自備工本解工部鑄錢則官免市于民制錢從上行下而私鑄之勢孤矣部府體尊堂廡與閭右濶隔除搭放外錢何繇得到民間然搭放幾何莫若推痛癢相關之誼通嫂溺手援之權工

部所鑄錢發五城兵馬司應天府所鑄錢發上江兩縣
應卯經紀原係在官之人先納銀于官每官錢一千時
價一兩姑與一百之利使之樂趨五城兩縣以銀解部
府還原借存留鑄本毫釐無缺銀到錢發隨發隨鑄或
數季或一年如此則官錢布滿洋溢經紀有不領官錢
而獨買私錢者乎百姓有不行使官錢而反用私錢者
乎上得執而刑之其誰敢犯在禁者理直氣雄無秦越
人肥瘠相視之嫌在下者蒙福獲利安享長便亦無去

福求禍之理官民兩便祈盡變民間為官錢而此例即止刑法不煩私錢之跡屏矣每鑄錢一千文算買紅銅黃銅罐炭匠雇等費本銀不過七錢七分而直銀一兩若用一兩本則可得四錢之利也繇此推之鑄萬兩則利四千鑄百萬兩則利四十萬鑄愈多而餘利愈無窮本銀即還故處餘利別置簿籍可以備築城浚河之用可以佐常平賑濟之用見今九邊無糧餉取此有餘灌輸于彼如前年遠左故事何為不可古稱軍國用不足則

制之歷代智哲之臣言其利者非一夫鑄而可以杜私
錢猶不可不多鑄也況裕國而濟民為利甚鉅奈何可
置而弗圖哉然鑄之大患在于無銅年前有商七人今
或亡或逃存者二人而已究銅之所難得則凶年物貴
盤運為艱關津重疊抽稅不一及至都城則戶部索其
稅工部索其銅衙門之使費滋擾借貸之賠累難堪鞭
策囚繫勉強支應今欲甦其困以示招徠莫若戶部銅
商改隸工部或收其本色作稅而于稅外別買低昂悉

照當時給直或將其稅銀特免而較數歲為常豐凶無
二價但責完銅商不苦于煩費官不苦于權分此不可
不議也蕪湖關控扼大江為陪京門戶私鑄姦豪盤聚
其處每銅商船至則羣擁邀截高價強買佯作倭鉛點
造黃銅器玩而寔則轉輸深僻之處競鑄私錢今宜盡
驅其人遍毀其爐令就內城錢局軍廠近處或點綴黃
銅或發賣紅銅使川貴之銅悉萃聚于鍾阜石城之內
毋令散逸為豪右資此不可不議也又大明律錢法一

歛私錢坐絞古錢兼用其旨總歸之便民若乃器用則
民間除軍器鏡子寺院鏡鉢外餘應廢棄者皆輸之官
私相賣買者有罪蓋收下之銅而歸之上即賈生所云
銅不布下則上權不分之意也今百姓鎔冶鏤刻作無
用之器極神工之巧華靡僭擬秦鍾漢鼎商彝堯罇皆
可偽鑄一爐千金破產無悔拐騙傷俗不若申飭律禁
一切收之官府量給銅價湊鑄銅錢即縉紳世家土瓷
木石器具儉樸日用甚適豈必用銅唐劉秩謂銅之為

物以為兵則不如鐵為器則不如漆即禁之無害禁則銅之費不廣而價日賤并可挽俗此不可不議也銅既易足工冶具火齊得贏利可以坐取不此之務而務礦稅何為哉三十五年南工之題停爐減鑄也事下北部議覆今讀其疏內述科臣郝敬所題修舉錢法以開財源無征科之擾收自然之利已經戶部會酌每銀一兩有利四錢該南京亦務在審勢揆時較前度後俾為經久可行無致倏而議減又倏而議增止議減爐不議私

鑄則姦民反操利柄而國家不得收園通之利等因彼時蓋已料今日之及此矣目今揆時審勢私錢既不可留官錢又不易得情法業已交窮標本自應並治譬之人身然必元氣盛旺而後邪氣自消未有反耗其元氣謂可以消之者又譬之家然必丁衆強寔而後外盜可禦未有自戕其衆謂可以禦之者較之前而多鑄之時其財足人悅都人士追思之狀如彼度之後而減鑄以來其窮苦伶仃令人啼怨之狀如此則又安得守拘攣之見

昧大通之觀以區區搭支之錢塞熙熙待哺之望但未
奉明旨則部臣府尹無從遵行乞蚤敕一日則都民蚤
蒙一日之賜獲免罪戾而臣等亦逃于鯨曠矣況留京
災荒相繼黎元菜色未復今二麥未成苗秧未種滁陽
池河之間四山頂上蝗蝻忽生延袤數百里所過聲如
風雨一望無際田夫村婦且捕且泣片時盈石麥穗成
虛細秧如剪臣詣營擇賞見屯軍四月無糧枵腹荷戈
又罹此災此誠堯湯水旱無虞鬻子宜鑄莊歷之時也

可漠然而不為備耶江洋都市盜賊公行又豈堪私鑄
為逋逃數漢大夫言流放人民倚仗豪家藏大澤深山
將成姦偽大業今應安寧國無為池太常鎮諸處種種
皆是以重崖絕嶮逶迤深谷為巢穴以三江太湖浮天
浸雲之境為堂奧有告發者操巡衙門令未及下而耳
目偵探星馳電驟先聲預匿或投械于水中或掩窖于
石底或赭林木而禽舉或火蘆渚而魚逝間獲脅從人
器相離遽難坐死迨州縣提解則亡命代死千百其身

元惡大憝罔可蹤跡矣計惟府州縣官密邇其地閑躡之于不識不知之時而密擒之于倏出倏沒之頃得虞詡龔遂其人者則姦黨自無所遁亦惟嚴旨特勅守令有功紀錄寬縱者無論受賄與否皆以奉職無狀論白簡從事三尺具在然後沿江一帶有司不敢視以為戲也同心協力然後此輩可得而滅夫廣鑄官錢所以惠貧民而為絕私錢之本嚴懲私鑄所以鋤亂民而維行官錢之法一以寔國計一以振國威財藏於不匱之府

令行如流水之源起太公管敬仲而借箸焉計諒無踰
是伏望聖明垂意詳覽下部查議如果臣言非迂轉行
南工部應天府逐款再加斟酌舉行臣無任戰慄俟命

之至

萬歷年王
萬祚疏

臣竊念之屢據在京耆民吳汝極邵文德等呈稱願復
舊爐收回鑄匠處給資本工部仍前鑄造每本銀一萬
兩歲可得利銀五千兩不等倘所處工本愈饒所得餘
利更厚用之修築浦城足壯萬年根本以之接濟民用

足杜私鑄源流等情屢經臣等審准在卷以待部堂會議不意邇來官錢愈涸私鑄日橫本年九月初二日猝有搶奪之變該臣堂官操江僉都御史丁賓題奉聖旨錢法乃國用所關如何姦民私鑄輒敢公行且違禁搶掠好生玩法着嚴行究治其官錢仍計議廣鑄以濟急用丁賓着照舊供職該部院知道欽此又該南京內守備等衙門並題奉旨設法廣鑄隨該部院大臣遵奉惟謹會同九卿科道計議戶兵工三部各措帑銀三萬兩操

江衙門餉銀一萬兩共銀十萬兩聽從工部督鑄分司
支領廣鑄官錢以濟民用其私錢盡行諭禁民間遵依
都不行用止嗷嗷待濟于官錢不殊渴旱之望泉霖也
臣想工部督鑄分司當此上下交責之會鑄本充盈之
日雖欲執迷偏聽曲辭故推亦無如上虛明旨下拂民
望何矣因是以該司錢法事宜揆之分司共督寶源局
府軍倉織染所三處原額六百爐後併為三百爐今當
盡復舊數每月除一次常鑄外以一次廣鑄可用本銀

一萬兩積至十箇月而本銀十萬兩鑄完一次便可得
餘利銀三萬六千三百六十三兩零若鑄完三次共可
得餘利銀一十萬九千九十兩零此自戶工則例載在書
冊記之若文思院搭鑄餘利又不啻是孰非國家園府
自然之利柰之何違衆而坐失之但此利議歸工部為
工部錢法之所不載若此利還歸部院為部院歲支之
所不及臣愚以為從民之請度戶兵工三帑匱乏專留
此項餘利湊足浦口城岸分築之費將見部帑無勞于

過損城岸各底于堅完其便一十萬金刀之利歲歲通
流民間始自京城旁及外郡所在無徵貴徵賤之擾而
錢法永定其便二貲本縱饒于前餘利不減于舊司臣
日夜鼓橐而箇文不嫌于染指其便三有此三便而司
臣督鑄謂宜虛心殫力循例而圖之毋煩人言之喋喋
矣惟是買銅之法舊多權子母于銅商如閃爍之故智
不可徇也添鑄之規反至開竇穴于鑄局而潛藏之宿
弊不可仍也若以商情宜恤何不明開時價以平之如

以買銅宜多何不兼用官買以導之考之前此督鑄亦
嘗議而行之著有成例雖經戶部應天府搭鑄不聞移
令自行買銅奈何目今計議廣鑄而重以買銅之說故為
抵牾不涉于臨事推諉之嫌乎哉臣為是惓惓亟望于
司臣之督鑄者然尤有說焉臣聞之大臣以任人為明
庶臣以任事為忠若大臣任得其人將躬不煩而事集
于以阜民衛國隨所指裕如矣如浦口城岸分建戶兵
工三部慎簡材品不二心之臣任之而毋聽其避免虞

其不相為屬也歲以京營巡視科道臣稽察其功次事
完為之奏報優敘有不協心併力壯國家根本之重地
者否也如時下設法廣鑄工部另簡廉明有幹局一二
臣畀之而勿狃于恒格虞其不能自明也循用九庫巡
視科道臣驗記其出入城完併為移行奏敘有不赤心
白意收國家泉貨之大柄者否也第事經叅驗乃合謀
惟善斷乃成聞之當斷不斷反底于敗語亦有之需者
事之賊也目今南京部院大臣方將有事城工而適

丁錢法計議廣鑄之會因以其餘利裨補續估錢糧其
前此題允銀數預先支取付之定委司官封識貯庫聽
從刻日鳩匠辦料興工先行具本題報庶幾事一舉而
兼得謀兩利而俱存不然錯過今冬又將明春水漲親
估覆請更待何時煌煌明旨豈將諉之道旁舍耶

萬歷年傳

宗臯
疏

按壬午賦役冊官房僅五十餘間歲賃鈔未及二百今
所徵鈔貫蓋寔數也第鈔有本折銀錢相兼遂致解納

之費嘉靖六年明詔凡錢鈔折收銀兩宇內莫不奉行
浦中折鈔之錢竟未能革豈非留都密邇難以禁中貴

之欲乎

江浦志

洪武間用寶鈔與古錢兼行其後鈔廢雜用累朝通寶
并開元錢嘉靖以來止用開元滁和六合所行肉好皆
有周郭浦次之浦子口又次之江南則輕小甚矣雖母
權子而行時有壅格之患今通用萬厯制錢於地方甚
便惟嚴禁私鑄而不使濫惡相欺何患錢法之壅乎

同上

丘濬曰自宋人為交會而金元承之以為鈔所謂鈔者
所費之直不過三五錢而以售人千錢之物嗚呼直而
至於千錢其體非大則精必非一日之功所成也乃以
方尺之楮直三五錢者而售之不可乎民初受其欺
繼而畏其威不得已而黽勉從之行之既久天定人勝
終莫之行非徒不得千錢之息併與其所費三五錢之
本而失之且因之以失人心虧國用而致亂亡之禍如
元人者可鑒也已然則鈔法終不可行哉曰何不可行

執其可行不可行之兩端而用其中斯可行矣何者上古之世以珠玉為上幣黃金為中幣刀布為下幣中古之世周立圜法兼以黃金布帛二者為言雖以王莽亦作金銀龜貝錢布之品後世專用銅楮二者為幣而不準以金銀是以用之者無權而行之既久不能以無弊故其立法之始未嘗不善然皆以不善終之古今一律也本朝制銅錢寶鈔相兼行使百年于茲未之改也然行之既久意外弊生錢之弊在于偽鈔之弊在于多革偽

錢之策臣既陳於前矣所以通行鈔法者臣請稽古三
幣之法以銀為上幣鈔為中幣錢為下幣以中下二幣
為公私通行之具而一準上幣以權之焉蓋自國初以
來有銀禁恐其或閑錢鈔也而錢之用不出於閩廣宣
德正統以後錢始用于西北自天順成化以來鈔之用
亦微矣必欲如寶鈔屬鏹之形每一貫准錢一千銀一
兩以復初製之舊非用嚴刑不可也然嚴刑非聖世所
宜有也竊以為今日制用之法莫若以銀與錢鈔相權

而行每銀一分易錢十文新製之鈔每貫易錢十文四角完全未中折者每貫易錢五文中折者三文昏爛而有一貫字者一文通詔天下以為定制而嚴立擅自加減之罪雖物生有豐歉貨殖有貴賤而銀與錢鈔交易之數一定而永不易既定此制之後錢多則出錢以收鈔銀之用非十兩以上禁不許以交易銀之成色以火試白者為準寶鈔銅錢通行上下而一權之以銀足國使民之法蓋亦庶幾焉

皇明經
濟錄

丘濬曰接近時馬政亦有科錢買馬之令然所得者未必良而給之于軍遇有倒死賠償如故而西北之邊苦之尤甚請自今以後朝廷酌為中制定為馬價馬之價公私交易皆不許過二十緡違者馬與價俱入官牙行之人坐以違制罪

大學衍義補

國初竈丁辦鹽每引四百斤給工本鈔二貫五百文蓋洪武年間鈔一貫值錢十文故竈丁得實利如是而冒禁賣私鹽絞死可也今鈔一貫不易粟二升乃禁絕竈

丁勿賣私鹽是逼之餓以死也此後來行法之弊非初

年之失也

左編

丘濬曰臣請敕所司嚴加禁約於凡民間造麴器具悉令折毀與凡為之傭作者一切勒以歸農有犯以與私鹽偽錢同科如此則一年之間亦可存麥百餘萬石以

資民食

同上

張孚嘉渭南人嘉靖丁未進士歷官副使有清名將卒謂子孫曰世人生但識幾字死則有一部遺文生但餘

幾錢死即有一篇志文吾恥之否德不足辱明公筆自題
姓名官位家世歲月紀諸石爾蓋先達有行之者子孫

必遵吾言不則為不孝

湧幢小品
以下詞話

洪武時倪元鎮賣田宅得錢數百緡會張伯雨至念其
貧且老悉推與之不留一緡每乘扁舟飄然於五湖三

泖間

以下
雜記

劉伯溫題陸翁賣花叟詩云君不見會稽山陰賣花
叟賣花得錢即買酒

後承平久張洪修撰每為人作一文僅得五百錢

吳槱洪武間官四川還家一日見瞿宗吉自誦其詩云
薄宦蕭然作遠遊行囊那得一錢留孟光不比蘇秦婦
肯笑歸來只敝裘

馬浩瀾著花影集花影者月下燈前無中生有以為假
則真謂為實猶涉虛也其落花滿庭芳云分明似身輕
飛燕扶下避風臺當初珍重意金錢競買玉砌新栽更
翠屏遮護羯鼓催開

李西涯曰白髮華燈一夜春江南江北兩窮鱗飛騰有
地歸塵土訶護無錢役鬼神物以泡名終合盡家隨身
在更何貧清詩素壁猶堪玩休羨揚州鶴上人

王存敬曰七賢言志一燈前次到迂夫獨莞然食祿十
年官再徙不曾留得買書錢

唐伯虎言志詩云不煉金丹不坐禪不為商賈不耕田
閒來就寫青山賣不使人間造業錢

正德年江東有太守某者禱紫姑仙以決疑仙姑降筆

曰幾樹甘棠種未成使君何事苦經營雷霆怒擊冰山
碎只恐錢神也不靈

成化中日食九食之既一太白入南斗彗見西北長三
丈三閱月乃沒彗見軒轅星孛台斗孛天田入太微襄
陽雨黑泰山陰雨血京師雨錢山東黑氣亘天晝晦長
樂山突起各一

錢通卷二